

Loša statistika – siromašni građani

Opstrukcija efikasnog prikupljanja statističkih podataka u Bosni i Hercegovini od strane RS izravno i vrlo negativno utječe na nastojanja da se privuku investicije i otvore nova radna mjesta, kazao je prvi zamjenik visokog predstavnika Larry Butler studentima ekonomije koji su sudjelovali na današnjem okruglom stolu o poslovnom okruženju u BiH.

Ambasador Butler je rekao da se vlasti RS moraju pobrinuti da predstavnici RS bez daljnjeg odugovlačenja potpišu memorandum o saradnji koji je izrađen u skladu sa Zakonom o statistici, a kojim će se osigurati bolja saradnja i uskladiti sistem prikupljanja statističkih podataka.

«Dobar način prikupljanja podataka je stub funkcioniranja privrede koja može privući investicije i stvoriti nova radna mjesta», rekao je ambasador Butler. Međutim, istaknuo je da nepotpisivanje ovog dogovora od strane Republičkog zavoda za statistiku RS, čime bi se osigurala bolja saradnja sa Federalnim zavodom za statistiku i Agencijom za statistiku BiH, znači da «privreda BiH – i građani koji ovise o toj privredi – moraju podnositi sasvim nepotreban teret.»

Dodao je da opstrukcije od strane RS-a utječu na buduću pomoć donatora. Evropska komisija bi pružila pomoć statističkom sistemu putem zajedničkog projekta vrijednog 1,5 miliona KM i 500,000 eura za tehničku opremu od 2006. godine. Ovaj projekat će biti stavljen na čekanje ako RS ne prestane sa opstrukcijama.

«Ovdje se ne radi o državi nasuprot entiteta – radi se o razumnom sistemu koji će objediniti resurse različitih tijela koja se bave prikupljanjem statističkih podataka kako bi ona mogla pružati informacije potrebne poduzetnicima,

investitorima i onima koji su u vladi zaduženi za planiranje», rekao je ambasador Butler.

Okrugli sto je organizirala Sarajevo Graduate School of Business. Njezina zgrada je obnovljena uz pomoć sredstava USAID-a, a nudi postdiplomski studij u saradnji sa Univerzitetom u Delawareu iz SAD-a.